



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 7

Kejriwal Judicial Custody nung August 27 tashi ayutsü

Taoba Bangladesh PM Khaleda Zia indang bank accounts lapoktsütsü

VOL. XXI ISSUE NO. 308 (ADOK 308) DIMAPUR RASEMNU (WEDNESDAY) LUROI (AUGUST) 21, 2024 ₹ 5.00

Dimapur-Kohima NH 29 ano melapok

Dimapur, August 20, 2024 (TYO): Kohima district kübok Dzüdza apu anasa Dimapur-Kohima NH 29 anentsüh agi anenbanga lir.

Tesüiba anogo ishika tzunglu kanga aruba ajanga Sechü Zubza sub-division kübok anentsüh agi gari lenmang anenbang aser iba ajanga traffic nung timtem ajurur.

Mongulbarnü Kohima District Disaster Management Authority (DDMA)-i Kohima District Planning and Development Board hall nung rongdak senden ka ayonga NH 29 nung anentsüh aliba onük lemsatepa liasü.

Senden nung Kohima DC Kumar Ramnikant menden liasü aser pai ashiba agi Sechü-Zubza SDO (C) den yimtsung tanishirtem aser contractor tenung nung nisung kari anentsüh aluba tesem semdang report ka agütsüogo.

Iba tesem semdangtüsü aser maparen inyakba ktdangtsüa reprangtsü atema ADC & CEO DDMA, Rhosiotho Nguori chairman ser luden ka tentetogo ta DC Ramnikant-isa ashi.

Ludeni anentsüh aluba khuret atema asadanger report ka agütsütsü aser ibaji bangdak ktdangpur dangi abentsü ta paisa ashi.

Mongulbar tashi nung khu abenba truck gari aika lenmang

nung anendena lir aser tanü semdangi aoertemi truck gari driver tem nem chiyungtsü den tang nungdakbatem agütsüogo.

Kohima DC Ramnikant-isa Dzüdza apu anasa chainage KM 163+980 nungi KM 164+030 (RHS) tashi lenmang lapoktsü atema mapang agitsü ta metetdaksüogo.

Kohima nungi Dimapur tashi senzüba gari tilatemi Jotsoma-Khonoma-Mezoma-Sechüma-Sechü Zubza road aser Dzüdza Bridge-Mezo Basa-Sechüma-Sechü Zubza road ajanga senzütsü metetdaksür ta pai ashi.

Maneni, Dimapur nungi Kohima leni atuba garitem Peducha Bridge-Tsiesema (10 Mile Road) ajanga senzütsü metetdaksür ta Kohima DC-isa ashi.

Ketdangsürtemi lenmang lapoktsü atema kanga meranger saka tzunglu maneni aruba ajanga mapa inyakba nung timtem ajurur.

Hombar aonung anendena aliba garitem süidaksütsü atema iba lenmang ya khen atema lapok saka anentsüh tasen alua anenbang ta osang angazüker.

Külen, Nagaland State Disaster Management Authority (NSDMA)-ia August 25 tashi Nagaland kübok district ajunga nung tzunglu arutsü osang metetdaksüogo

Centre-i Mizoram Rs 8 crore agütsüogo

Aizawl, August 20, 2024 (Agencies): Mizoram nung Myanmar, Manipur aser Bangladesh nungi aruba refugee 43,000 tema yaritsü atema Centre-i Rs 8 crore agütsüogo.

"Taoba Mizo National Front (MNF) sorkar mapang Rs 3 crore agütsü aser tang Zoram People's Movement (ZPM) sorkar mapang Rs 5 crore agütsüogo" ta Home Minister K Sapdanga-i ashi.

Assembly nung opposition MNF zungsem Ramthanmawia-i asungdangba ka langzudang "tesüiba nung Rs 3 crore angubaji refugee camps nung nungdakbatem aser Myanmar nungi arur yariba nung amshi aser tanungba Rs 5 crore ji ano mamshi lir" ta Sapdanga-i ashi.

August 13 tashi nung Myanmar, Bangladesh aser Manipur nungi refugees aser internally displaced persons (IDPs) 43,737 tashi Mizoram

nung jenoka lir ta state home department-i ashi.

Myanmar nungi refugee 33,724, Manipur nungi IDPs 7,999 aser Bangladeshi refugees 2,014 lir ta parnoki ashi.

Myanmar nungi refugee teimbaka Champhai district nung jenoka lir. February 2021 nung mitkari sorkar atsungdokba sülen Myanmar nungi aser talisa Chin state nungi nisung aika Mizoram nung arua jenoka lir.

Bangladesh kübok Chittagong Hill Tracts nungi Bawm nungur November 2022 nung Mizoram-i aru. Bangladesh army-i parnok anema mapa inyakba ajanga parnok jena aru.

Manipur nung Kuki-Zo nungeri Mizo nunger den sendaktepa lir aser May 2023 nung Manipur nung Meitei aser Kuki nunger tsungda rara adokba sülen parnok aika Mizoram nung jenoka lir.

NIA nem ULFA-I bomb ken o 2 agütsür

Guwahati, August 20, 2024 (Agencies): ULFA-i-i Independence Day bomb amokmerenba ken o tongtipang ana Assam Police-i National Investigation Agency (NIA) ket nung agütsütsü lemtetogo.

ULFA-I-i August 15 nü Assam kübok tesem 25 nung bomb yuja lir ta osang metetdaksüba sülen Assam Police-i iba mapa inyaker.

"ULFA-i-i amokmerenba dak sendakba nung ken 10 benoka lir.

Guwahati aser Lakhimpur dak sendakba ken o tem federal investigation asütsü langa lir ta onoki lemtetogo" ta DGP GP Singh-i ashi.

Iba ken o atema ozung amertemi bushisingdangba nung takok ngua arudar aser parnoki Sivasagar nung temlung melemi bilemer nisung 4 puogo. Iba tasa atonga inyakba nung par pezü rongnung nisung kati tongti shilem agi ama bilemer.

Nagaland nung High Court balaka amenoktsü bangjemtep



Kohima, August 20, 2024 (TYO): High Court Bar Association (KCBA) Kohima-i Nagaland atema High Court balaka amenoktsü atema inyaktsü bangjemtepogo.

Mongulbarnü Gauhati High Court (GHC) Kohima Bench nung aliba Bar Room nung High Court Bar Association Kohima lokti senden ka amendang iba lemtet agi.

1972 nungi Gauhati High Court (GHC)-i kübok Nagaland nung High Court maparen inyaka arur. Nagaland nung High Court balaka nungdaker ta angateta High Court Bar Association Kohima-i iba lemtet agi.

High Court Bar zungsemtemisa Kohima Bar Association-i noktakba onük pusema nungittsü lemtet. Lawyers aser police kar tsungda miim tesentaktep yanglur inyaksangshiba anentsüla ta High Court Bar zungsemtemi nenshia metetdaksü.

HCBA president C T Jamir-i ti o jembidang tesüiba küm ka tsungda mapa inyaka aruba osangtem lemsatep.

Paisa zungsemtem maneni yariteptsü aser High Court Bar akangkanga ayutsü ayongzük.

HCBA lennir tejen Advocate T B Jamir-ia zungsemtem ayongzüka jembidang "advocate

tem ya ozung tesayur masü teti ozung kaketshirtem asütsü. Koba anogo advocate kati pa/la ozung tesayur ka ama bilemdir iba anogo nungi pa advocate masü" ta ashi.

HCBA tarutsüji tanü lanur zungsemtem lir aser asenoki inyakba mapa nung tayongzükba jenti ajurur aser iba atema asenok tekolok aser tangatetba renema alitsüla, ta paisa ashi.

"Lawyer shingaia meranga meinyaki takok mangu anungji lanurtemi temlung agütsütsüla aser bendanga agüja takok anguba lawyer ka akümtsü merangtsüla" ta T B Jamir-isa ayongzük.

NACDAOR-i SC anema tanü Bharat Bandh ayongzük

New Delhi, August 20, 2024 (Agencies): 'Reservation Bachao Sangharsh Samiti' ajanga Bodbarnü Bharat Bandh ayonga lir aser iba ya Supreme Court-i tawa reservations atema obendang ka agütsüba anema lir.

August 1, 2024 nü Chief Justice of India, DY Chandrachud-i aniba bench kati "state sorkartemi Scheduled Castes aser Scheduled Tribes ano sub-classification asütsü temelaba agütsür aser iba ajanga parnok sasep nung backward castes talila dendaktsütsü" ta

oshidang agüja liasü. Ajisüaka, National Confederation of Dalit and Adivasi Organsiations (NACDAOR)-i iba oshidang meyipa agütsü dena onük ishika takhangba agütsür.

Supreme Court-i iba oshidang agütsüba ajanga SCs aser STs temetentem nung timtem bentsür arutsü anungji Centre-i iba oshidang magizüktsüla ta NACDAOR-i akhangar.

Parnokisa SCs, STs aser Other Backward Classes atema 'justice and equity', reservations

atema Parliament nung Act ka yanglutsü, central government jobs nung SC/ST/OBCs atema caste-based data sayatsü, higher judiciary nung SC/ST/OBCs asoshi 50% nükjidong ayutsü aser central/state government jobs den public sector undertakings nung mapa tazung alibatem nung nübotem shimoktsü takhangba agütsür.

Political party asem- BSP, JMM maser RJD ajanga NACDAOR-i ayongzükba Bharat Bandh pusema nungitba metetdaksüogo.

AYO aser NSCN-K Khango tsungda angatettepogo

Kohima, August 20, 2024 (TYO): KKB Rulho kibur nem tasüba temerenshi agütsüba sülen ita ka shi atsütepa aruba sülen Mongulbarnü Angami Youth Organisation (AYO) aser NSCN/GPRN (K) Khango tsungda tangatettep kati aruogo.

KKB Rulho kibur K Rulho-i ozüngi memelaba tax magütsüba atema NSCN-K Khango-i pa nem taküm agiitsü amokmerenba sülen AYO-i July 27 nungi NSCN-K Khango den amalitep kecha malitsü metetdakja liasü.

Naga yimtenren teloktemi ozüngi memelaba tax saruba anema AYO-isa August 6 nü Kohima nung public rally ka ayongzüka agia liasü.

Ajisüaka, parnok tsungda senden 30 tema amenba den Ceasefire Supervisory Board dena ajurutepa senden mena liasü. Tanü Kohima nung sendenji

Ceasefire Monitoring Board (CFMB)-i acha-ayanga amen.

"NSCN/GPRN (K) Khango-i M/s KKB Rulho kibur nem tasüba temerenshi agütsüba tatemzükba kecha melii meyipa agitsü mulungtepogo" ta AYO President Kesosul Christopher Ltu, General secretary Neidilhoutuo Sechü, NSCN-K Khango Kilo Kilonser Visheto Yeptho aser CFSB Supervisor NSCN/GPRN-K Khango A. Imyapangba Ao nungeri sangdong ka nung ashi.

NSCN/GPRN (K) Khango-isa Nagaland kübok district balala nung Angami contractor temi mapa meinyaka atatsü tetuyuba agütsüba meyipa agitsü mulungogo.

NSCN/GPRN (K) Khango-isa yimjak nung "Max Naga" maittsü jangjatsütsü aser tanü nungi tenzüker anogo 15 tsungda pa dak disciplinary action agitsü

lemtetogo.

Max Naga maittsü yimjak nung metetdaksüba sülen ang AYO-i NSCN/GPRN (K) Khango den amalitep malitsü lemtet aser Angami nunger ajak anentsü tetuyuba agütsüba agientsü ta lemtet.

NSCN/GPRN (K) Khango-i AYO den iba ken o adokba atema sasaba metetdaksü aser Angami Public Organisation-i 1993 nung bangzung renemba "Sorkar Ka, Saru Ka" sülen anidaktsü metetdaksü.

CFMC-i acha-ayanga agiba sendenji ghonda 4 tema amen aser timi dang olemteper tangatettep kati aru ta AYO ajanga osang angazüker.

Iba senden nung NSCN-K Khango tenung nung nisung 7 aser AYO zungsemtem den K Rulho'er kinungertem dena nisung 50 shi aden ta osang ajanga ashi.



Nagaland Angh La Ganesan-i August 20, 2024 nü Naga Bhavan Conference Hall, Kohima nung Director, Postal Nagaland, Dr. Alice K. Vizo-i anir Postal Service, Nagaland ketdangsürtem den senden ka amendang tangokba noksa nung angur.

August 22 nü Committee on Public Undertakings senden amentsü

Dimapur, Luroi/August 20 (TYO): Committee on Public Undertakings (COPU), Nagaland Legislative Assembly, indang Chairman, Imkong L. Imchen-i Department of Industries & Commerce kübok NHTDC, NIDC, NHHDC, Department of Geology and Mining kübok NSMDC, Power Department kübok NERC aser Department of Municipal Affairs kübok KSCDL ketdangsürtem den Oral Evidence Meeting amentsü metetdaksü. Iba senden ya August 22, 2024 anüngdang 11:00 ako nungi tenzüka Nagaland Legislative Assembly indang Committee Room nung 2021-2022 küm atema C&AG Report of India asadangsü atema amentsü. Anungji committee züngsem ajak iba senden nung adentsü ayongzüker. Kasa senden nung tendering evidence atema nüngdakba documents ajak bener Departments/Corporations indang AHoD, HoD aser Managing Director tem ajak adentsü ayongzüker, ta sangdong ajangasa ashi.

Peren Town nung anti-rabies vaccination drive agitsü

Dimapur, Luroi/August 20 (TYO): Peren Town nung azü nisung dak angoba rate taoksatsüka kumogo aser rabies ajanga nisung asüba ya 100 shilem lir, ta Additional Deputy Commissioner, Peren, Japhet Woch ajanga sangdong ka nung metetdaksü. Anungji nüburtem kumzüka ayutsü mechi Peren Town Council ajanga Veterinary Department den lungjemer Peren Town kübok ward balala nung August 22 & 24, 2024 anogotem Anti-Rabies Vaccination drive agitsü, ta ashi. Iba dak sendakba nung ADC Peren Town ajangasa jila nung azü kiburtem dang vaccine mela-mela agitettsü mechi azü sendaka ayutsü metetdaksü.

Ao Senden-i khukhua aitsür

Dimapur, Luroi/August 20 (TYO): Akumen yimtsüng nungi Asür Thapa (Nepali) alias Karlijang Aier'er jabaso aser NSCN-K (Khango) nung sergeant-major Moakaba Aier-i Saringyim village nung arishi küm pezü tanur ka dak shiruru yimya nung tashiyim amshia shi nung medemba khukhua aitsür, ta Ao Senden sangdong ka ajanga ashi. Linük tenzüker ka linük aser nüburtem ajungkettsü atema inyaksü melena tai maket tanur ka yirutsütsüsa tesüngmangtsü mapa tamajung inyakogo. Linük tenzüker ajanga iba ama tesempatsü mapa tamajung inyakba ajanga nüburtem tali ain adoka alidang nüburtem sunepa alitsü aser kumzüka ayutsü tongtipangtuba kumogo. Tarutsü nung linük tenzüker kari danga Ao senso dak timtem kar danga agütsüra, mapa tamajung inyaker aser par telok Ao litsü nungi ainshidaktsütsü, ta Ao Senden ajanga ashi. August 29, 2003 nü renemba pangzüng nung Ao Senden masetshi nokdaka lir aser tensa den apet mera agitsü, ta sangdong ajangasa ashi.

Pungro nung Little Flower Hr. Sec. Section semzükogo



Dimapur, Luroi/August 20 (TYO): Pungro nung Little Flower Higher Secondary section tasenba August 19, 2024 nü semzükogo, aser iba sentong nung MLA S. Kiusumew aser ataloker ta pai ashi aser lenmang majungba atema administration aser MLA dang akokba lenmang nungi reprangtsü ajungshia liasü. Paise Catholic Church ajanga nüburtem tenzüksü temulungtetba nung inyakba indang lemsatep aser kaketshirtem aser nüburtemi temelenshi bener arutsü ama inyaktsü imlar ta ashi. Educational environment tajungba kumdaktsütsü atema tesayur aser administration tsüngta amalitep akatsü tongtipang lir, ta paisa ashi. Kaketshir temi iba sentong nung shilem tajung agiba ajanga MLA S. Kiusumew mulung nung kongshia liasü. Pungro terenlok asoshi nüburtemi bendanga agütsür inyakba atema pai pelaba lemsatep aser iba lenmang yanglutsü atema temulung agütsütsü ta ashi. Pai Bishop dang school nung Science stream benoktsü atema ayongzüka liasü. Catholic Church ajanga temelenshi balala bener arutsüba bilemteta jembidang, shisaliok dang masü lenla balala nung maongka tasen agütsür, ta MLA Kiusumew-i ashi. Iba sentong nung kaketshir temi sempet balala ajanga shilem agia liasü.

Dimapur Municipal Council ajanga metetdaksür

Dimapur, Luroi/August 20 (TYO): Nüburtem ajangzüksü mechi Dimapur Municipal Council ajanga mapang shia osettsüset nung jenjang atettsüba sülen DMC kübok aliba business establishments/dokan temi shidak anidaktsü metetdaksür, ta Dimapur Municipal Council sangdong ka ajanga ashi. Metokmeperiba lia consumers/nübur temi Councilor/Member/Incharge den mobile number 7005519238/8787717947 ajanga tongteprateptsü metetdaksür, ta Thungchanbemo Tungoe, Chief Executive Officer, DMC ajangasa ashi.

Skill Development Training atema application meshir

Dimapur, Luroi/August 20 (TYO): Tetsürtem arishi küm 18-25 tsüngta school mezüngteti anener alirtem nem District Hub for Empowerment of Women (DHEW) ajanga Soap Making Training agütsütsü, ta Deputy Commissioner Tuensang, Lithrongla Tongpi Rutsa, NCS ajanga Tuensang district nung alirtem atema sangdong ka agüja liasü. Iba indang form ya DHEW office nungi office mapang meshitettsü aser August 26, 2024 tashinung agütsütsüla. Iba training atema osang tejangjaba metetnera DHEW helpline number 7085729011 nung tongteprateptsü akok, ta sangdong ajangasa ashi.

NSCN/GPRN züngsem ana mapa nungi anentsüogo

Dimapur, Luroi/August 20 (TYO): Linük anema mapa inyakba nung shilem agiba mechi sorkar indang Ahza nung aliba ama Wokha district kübok Okotso yimtsüng nungi tang Signal Basti, Dimapur nung tenzüka mapa nungi anentsüogo, ta NSCN/GPRN sangdong ka ajanga ashi. Kija, lokti, society, unions, business associations mesüra state sorkar shirisa pa den teka amtepdirdir ner khuret asütsü aser yangji sorkar khuret kecha malitsü, ta Office of the Cabinet Secretary nungi sangdong ajanga ashi. Ano maneni sangdong ka nung, temesepba mozü amshiba aser linük anema mapa inyakba mechi NARRA, Article 92, Clause-II (Section-C) aser Article 76 Clause-III kübok tashi agüja aliba ama GPRN/NSCN indang National Service nungi Lieutenant Khekato Kiba bearing A/No. 31991 S/o Heyikhu, Hozukhe Villege of UT-I anentsür, ta Office of the Deputy Commander-in-Chief, General Headquarters, Naga Army, Maj. Gen. Yekuto Zhimo ajanga August 20, 2024 nü sangdong ka nung ashi. Iba totuyuba ya tang nungi mapa kuma amshitsü, ta sangdong ajangasa matetdaksü.

NAGALAND POLLUTION CONTROL BOARD								
Signal Point, Dimapur - 797112, Nagaland Tel.: 03862-245727, TeleFax: 03862-245728 Website: www.npcb.nagaland.gov.in e-mail: npcb2@yahoo.com								
AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBA JENJANG								
Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaktsütsüla"	
				13.08.2024	15.08.2024	03.08.2024		
1	Dimapur	Bank Colony	Residential	64	41	57	100 µg/m ³	
2		Dhobinala	Commercial	87	93	76		
3		NPCB Office, Signal Colony	Residential	65	32	27		
4		Tenyiphe, Chumoukedima	Commercial	48	39	30		
5		Nagarjan	Residential	53	40	40		
6		Viola colony	Residential	34	21	32		
7		Burma camp	Commercial	86	66	69		
				13.08.2024	16.08.2024	17.08.2024		
8	Kohima	Opposite NST Office	Residential	36	39	41		
9		PWD Junction	Commercial	38	40	35		
10		High School Junction	Commercial	39	67	45		
11		Midland (Upper)	Residential	31	30	21		
12		Forest Colony	Residential	-	35	32		

Iba osang ya nübortem ajangzüksü atema Nagaland Pollution Control Board-i agütsür.

Kejriwal Judicial Custody nung August 27 tashi ayutsü



New Delhi, Luroi/August 20 (Agencies): Excise Policy ken o nung Delhi indang Rouse Avenue Court-i, Delhi Chief Minister Arvind Kejriwal judicial custody nung August 27, 2024 tashi ayutsü tetuyuba agütsüogo.

Special Judge Kaveri Baweja-i, kasa anogo Kejriwal aser tangartemi anema ED-i benokba supplementary chargesheet tem asadangtsü ta metetdaksü.

Iba ken o nung Central Bureau of Investigation tenüng

nung Senior Advocate DP Singh nokdaka liasü.

Taoba hopta Chief Minister Arvind Kejriwal-i bail meshia mepeshiba aser CBI-i pa apuba Delhi High Court-i agizükba anema ken o benokba sülen Supreme Court-i CBI nem notice ka agütsü liasü.

Justices Surya Kant aser Ujjal Bhuyan nati Central Bureau of Investigation (CBI) dang August 23 nü tashi nung telangzüba ka agütsütsü tuyuba den CM-i interim bail atema mepeshiba magizük.

Kejriwal okatsür senior advocate Abhishek Manu Singhvi-i, health dak ajemdaker Arvind Kejriwal atema interim bail meshi saka bench-i ashiba agi, onoki interim bail magütsür. Onoki notice agütsür.

Singhvi-i ashiba agi, Prevention of Money Laundering Act kübok Section 45 kübok talenba liaka Kejriwal nem senotsü ochi mashi ken o nung asemben tashi interim bail agütsüogo.

August 5 nü Delhi High Court-i, Chief Minister apuba ya "legal" lir ta ashi. Kejriwal-i pa apuba anema ken o benokba parnoki magizük aser ashiba agi, pa anema 2024 küm April ita kuli teperi bendenogo aser CBI-i pa anema ken o maneni bushisüngdangdar.

Kejriwal ya Delhi excise policy 2021-22 ken o dak sendakba nung ED-i 2024 küm March 21 nü pua liasü.

Iba sülen pa Enforcement Directorate ket nung aliba mapang June 26 nü CBI-i AAP tekolakba ya pua liasü.

Office of the
MOLUNGYIMSEN SENSO MUNG DANG
P.O. Tuli, Mokochung : Nagaland

Tenüngsang Agütsür

- Asür N. Takum Jamir'er jabaso **Wb. Bendangwati Ao**, Deputy Superintendent of Police-i 78th Independence Day 2024 nung Nagaland Police nungi pai dang President's police Medal for Meritorious Service anguba atema tenüngsang agütsür.
- Rev. Supong Jamir'er jala **Kr. Imsuyatetla Jamir**-i AMA University, Manila, Philippines nung Doctor of Medicine jenjang atongba atema tenüngsang agütsür.

Molungyimsen asoshi konang nüngsang tulu bentsür aruba atema nuna dang kanga pelar aser nuna atanger aser nübür tenzüka wadang nung maneni Tsüngremi nuna moaja len aniang ta sensosangeri sarasademtsür.

Sd/-
N. Joseph Lemtur
President

Sd/-
B. Imsuinba Jamir
Secretary

Cong-i nongshiba ajanga lateral entry advert thitsüogo: Kharge



New Delhi, Luroi/August 20 (Agencies): Congress tekolakba Mallikarjun Kharge-i Mongolbarnü ashiba agi, par party-i nokdakba ajanga sorkari bureaucrats tem lateral entry atema advertisement thitsüogo.

Paisa, Bharatiya Janata Party (BJP) aser Rashtriya Swayamsevak Sangh (RSS) nati parnok tashi nung ali tashibo reservation tem rakzüksü asoshi tasa tasen maneni beoka aotsü, ta tekümdangtsü metetdaksü.

"Long live the Constitution! Linüknung Dalits, tribals, backward aser tashi maiba loktitem atema social justice asoshi Congress-i rarba ajanga reservation rakzüksü BJP sentong aliba raksatsüogo," ta pai ashi.

Union minister Jitendra Singh-i shiti ka ajanga Union Public Service Commission (UPSC) mendenbuba Preeti Sudan dang iba advertisement thitsütsü mepeshia shiti ka züluba indang tetshia jembiba mapang, Congress tir-i iba

ajanga Constitution tashi agi dang dictatorial tashi koktettsü ta sayur ta ashi.

Kharge-isa, Congress aser Indian National Developmental Inclusive Alliance party temi iba ken o anema nokdakba ajanga sorkari iba jenjang agiogo, ta ashi.

Property balala dak sendakba nung capital gains tax indang indexation benefits aginba, Waqf (Amendment) Bill Joint Parliamentary Committee dangi abenba aser Broadcasting Services (Regulation) Bill back-burner nung toktsüba indang jembiba mapang Kharge-i nübürtem aser Opposition tashi agi linük ya Modi sorkar ket nungi kümzüka arudar ta ashi.

Lateral entry ajanga public servant tem shimba ajanga mepetmesü adok aser Opposition-i ashiba agi, iba jenjang ya caste dak ajemdaker menden mekazüka toktsüba mezüpelangtsütsü nükjidong nung benokba lir. Iba scheme anemertem rongnung Union minister Chirag Paswan-ia

densema liasü.

Honibarnü UPSC-i, lateral entry inyakyim ajanga contract basis nung mapa 46 süngtsütsü advertise süa liasü. Iba sülen Deobarnü Rahul Gandhi-i, reservations rakzüka sorkari Constitution anema jenjang agir ta ashi.

Sorkar tenzükertem civil services tatidang ajanga shimmer, saka lateral entrants tem ya yimya agi wadang ka nung mongintem asür aser parnok indang indang shimmer. Tang iba appointment ya benoktsüsa quota kecha mali.

SC-i longkak aita aliba doctor tem dang mapai aotsü mepeshi

New Delhi, Luroi/August 20 (Agencies): Supreme Court-i Mongolbarnü linük ajanga nung longkak aita aliba doctor tem dang parnok dak tamang akatsü aser longkak aitba anener mapai aotsü mepeshia asüngdangogo.

Kolkata nung doctor ka tashiyim agi raksatsür tepsetba anema linük ajanga nung doctor temi longkak aita arudar.

Court-i ashiba agi, doctor tem mapai maoba ajanga medical teyari nungdaka alirtem dak kongshir.

"Doctor tem teküzmükba kübok toktsütsüji linük asoshi tinyaktsü tongtibangtiba lir aser iba atema onoki idaki lir. Yimlibilema onok dak tamang kang, ibayongji onoki iba ken o high court ket nung metoktsüi agizükogo.

"Onoki iba ken o ya temzüng ozüng alema inyaksangshiba ken o tamajung ka dang masü saka iba ajanga India ajanga nung healthcare institution dak kongshir ta

Badlapur ken o: NCPCR team-i ken o bushisüngdangtsü

New Delhi, Luroi/August 20 (Agencies): Maharashtra nung Thane kübok Badlapur nung school ka nung tebur staff temi arishi küm 4 tain tetsür chanu ana sexually abused asüba sülen nübürtemi longkak aita liasü.

NCPCR (National Commission for Protection of Child Rights) team kati iba ken o bushisüngdangtsü, ta NCPCR mendenbuba Priyank Kanoongo-i Mongolbarnü ashi.

Paisa, school nung ketdangtsürtemi iba ken o mimbangtsü meranga liasü, ta ashi.

"School inyakyim ya meshitak. Parnoki ken o mimbanga ayutsü merang. Ken o dak sendaka aliba police station-ia mapang shitak nung FIR mebenok. NCPCR team ka iba tesemi yoktsü," ta Kanoongo news agency ANI dang ashi.

Maneni Maharashtra deputy chief minister Devendra Fadnavis, shibai home portfolio bona lir, pai iba ken o dak sendakba nung

police officers tem mapa nungi aginja jenjang tajung agiogo, ta Kanoongo-i ashi.

"School administration mesüra FIR mebenokba ketdangtsürtem aser ken o mimbangtsü merangertem anema jenjang agitsüla," ta NCPCR tekolakbai ashi.

Iba osang angazükba sülen Mongolbar anepdang Badlapur nung nübürtemi longkak ait tenzüka parnok meyirejang aika jila nung railway station nung adenshi aser train lenmangtem nokdanga liasü, iba ajanga Kalyan-Karjat section nung train senzusenpong minpronga liasü.

Longkak aitertemi ken o nung aija alisang arishi küm 23 tain Akshay Shinde aletseta südaksütsü asoshi takhangba agüja arudar. Pa ya school nung merekmejur ka lir aser pa August 1 nü contractual basis nung shima liasü.

Kasa mapang nung Maharashtra chief minister Eknath Shinde-ia, sorkari special public prosecutor ka shimtsü aser ken o takaratiba nung bentettsü, ta ashi.



bilemer. Anungji Supreme Court-i iba ken o agizüktsü nungdaka liasü," ta Chief Justice D Y Chandrachud-i aniba bench-i ashi.

Kolkata kübok R G Kar Medical College and Hospital nung postgraduate trainee doctor ka shi nung tashiyim agi medemba sülen tepseta toktsüba indang ken o ka tanü Supreme Court-i angadanga liasü.

Federation of Resident Doctors' Association-i, Supreme Court-i iba ken o agizükba pelashishia agizükogo aser iba ajanga medical

fraternity tejangraba ataloktsütsü ta ashi.

Kasa mapang nung Supreme Court-isa, Mongolbarnü medical professionals tem anema inyaksangshiba nokdangtsü aser parnok mapa inyakba tesem kümzüka toktsütsü atema züngsem 10 agi kümteba national task force ka amenoktsü tetuyuba agütsüogo

Iba task force yagi hopta asem tsüngda interim report agütsütsü aser ita ana tsüngda final report agütsütsü, ta Chief Justice of India DY Chandrachud-i ashi.



TIR YIMYIM YIMOBILEM (EDITORIAL)

DIMAPUR RASEMNÜ, AUGUST (LUROI) 21, 2024

Tesayurtem kong lir ?

Wokha district kübok Ralan ta ajaba tesem nung Yanpha Govt.Middle School nung azünger kaketshirtembo school-i aru saka tesayurtem ka danga maru ta asüba school, department aser government-ji kechi school ? kechi department ? aser kechi government asütsü ? Iba tatalokba ya yangji alirtemi tawaktsü atu marem video yanglur prokshiba ajanga asenoki metetba dang ashi, ashiko Yanpha nung ya dang masü saka tanga tsüket nung aliba govwrnment school-tembo yutsür, asenok Mokochung district nunga tesem kar nungbo tesayurtem school-i maruba agi kaketshirtem akoksa alitsüa akok. Tanü putu nung ya tia majung ka, kong shiba nungi tenzükba sobaliba-ar mapa meinyaki ita sen agia chiyonga linüba nisungtem teimba kümogo. Ashiko, ajia asenok rongnung kati tenzüksüba sobaliba asütsüa akok ! Iba sobaliba yagi school tesayurtem nungi tenzük, office nung tematiba menden nung amener aser temeshi langbang nungi sayutsüngirtem tashi mapa masü kümdaktsüogo. Shin o nung ashi ama, mapa ya tekülemba lir. Tetezü, mapa ya Tsüngrem nungi aser mapa inyakba ajanga asenok taküm alir, anungji asenok nem moatsüba mapa inyaki aodang mesüra inyak tenzük dang asenok ya tekülem kidangi aoer ama bilema, Tsüngrem tenung sanga, nendaknendaka inyaktsübaji kanga tongtibang lir. Joko, mapa ya asenok asoshi atakatem masü saka temoatsü aser rongsen aruba lenmang lir ta asenoki angatetsüla. Aji oda, asenok rongnung nisung kar danga mapa meinyaki jangratema chia jema lira, ajibo aonung pongmang nung shi den chiyonga pongmangba amai dang asütsü. Ibaji shitakba tepela masü, aji ajep menü menüba amai lir. Iba pongmang nungji kenpiga lir saktangbo chizüa mangu timatemtsü. Kasaji asenok rongnung nisung kar danga mapa meinyaki takar akümba lira, ajia tamagitsü taila sen aika angu amai asütsü, aji magishitsü, kechiyong temoatsü aketba shitakba senjibo mapa inyaker anguba sen dang asütsü. Mapa yabo, shirangertem dak alaka, tepuokdak alirtem nema inyakdaktsür, kechiyong parnokjia mazüngi mapa inyaka ali nung dang tepoukdakjia aser chioker külena taküm shitak litettsü. Ibaji kodang bilemdangdir, mapa inyakertem ajak rongnung tongtibangtibaji tesayurtem ya asütsü. Asüng aser tarutsü asen lima aser asen putuji tanü tesayurtemi koma sayur, iba dakji dang keta lir. Aji oda, school nung tesayurtemibo text book nung aliba dang masü saka tanga kaketem nungia dena shisa tasen aser tulu bener arua tanurtem shisatsü aser tangatetba uludaktsütsü tim. Government mapasa rongnunga mapa tajungtibaji tesayur mapa ya lir, kechiyong iba mapa yabo anogo shia tanurtem den tashitemetet shisatsü aser asüng lima ajungtsü atema bilemba shisatsü tajungtem lemsatapa amongtsü aser mapang mapang shia sodi agia anisüngzüksü. Aji oda, tesayurtem asoshi tepela angudakji peii sayuba tenurtem tajung küma angubatemi lir. Iba tangatetba nung tanü Nagaland nung government school nung tesayurtem asentenshitsü asoshi School Education department nung minister, Commissioner, Secretary, Director, DEO aser SDEO purtem tama ken asentenshitsü nungdaker. Tesayur school-i ao mao memetetba tetezü, ashiko, item tuleritemjia mapai maor asütsü. Aji oda, kibong ka nung tsüraburi anir shinga mapa meinyak aser mapai mao ser koma koda taküm shitak litettsü ? Ashiko, Nagaland nungbo tesayurtem rongnunga mapai maobaji dang masü saka mapai mao ita sen agizüka iba sen jagi drugs aser yi alia chia jema senzüba tesayurtema alitsüa akok. Item ama tesayurtemji lira, Nagaland Police department purtem dang ajizüka, kong koma ali bushia anepalu nung ajungtsü. Ibai mapa meinyaki ita sen dang masü saka tangar dang nungi tenla sen, commission aser tax agiba tesüngmangtsü Nagaland lir ! Ashiko, Nagaland nungbo mapai mao ser ita sen agizükba tesayurtem dang masü saka nisung mali ser ita sen agütsüba tesayurtema alitsüa akok. Item ama tesayurtemji lira, Yanpha ama nung school-i maruba tesayurtemji bushiyonga asangsang nungbo mangutsüa akok. Ya shitakba asen Nagaland asütsü na ?

OLEMSABANG

ASÜKÜM AGI TERAкса ASER TELEMSA ADOKDAKTSÜR

~ L. Kika Pongener.

(Yashi adok nungi...)

Shirnoki ajemalua tila kümdir Tsüngremi parnokji sensakpo jenjang nungi temabai ajungkettsü, saka shirnoki pei sasa ulua bilema asükümer, parnokji teküpokba jenjangi atsür alutsü Tsüngrem dak tashi lir. Asenok nisung rongnunga, shirnok kanga-sa tepetzük jenjang nung lia aliba, tera jenjang junga kümdir, parnok jagi shinga tenuk agi mangu, kanga ngasangdema, asükümstsü aser shinga danga aküm-metsübuttsü. Iba amala nisungji lokti nung lennir shilem atara, pa/la lennisuba nungji tanidaknur kata malitsü. Ajisuaka, shirnok kibong tajung nungi, tsürabur sayubentsü tajung shia inteter, parnok jagi ajak den küsa/junga alir aser tangar danga akümstsübur. Pa/la lennisuba nungji nisung ajaki keta-sena anidaknutsü.

Nisung shinga-ia asüngji anogoi kechi bentsür arutsü kecha meteta mali, anungji shingaia asüng indang mezümeküma aser asüküma mejembitsüla aser meblemstsüla. "Asüng indang ne sasa mezümeküm tesu, kechiyong anogoi kechi bentsür arutsütsü nai memetet" (A.Shin-27:1). Aji oda, asüngji anogoi kechi bentsür arutsütsü'ar memetet sernung asenoki o tulu jembizüka yur, aji matalokra maaksu asütsü. Tejen putu nung mimchirtemi alima nung parnok tenung ka ayutsü atema, lungki ka anung tonga yanglutsü apuso, saka ibaji Tsüngremi memulongba mapa ka liasü. Anungji Tsüngremi parnok o parnok na tsüngda o benjatsü, aser iba mapaji tamakok angu (Lipok-11:1-9 nung iba otsü angutsü). Atangji, kechi mapa sudir suaka, nisung tashitemetet aser tenungiter (Supporter) aliba dak temulong ulua asüküma/mezümeküma inyakra, iba mapaji tamakok angutsü. Babel lungki anung tonga yanglutsü nukjidong yur apusobaji...Tsüngrem anema mezümeküma inyakba mapa ka liasü, ibajagi parnok nukjidong metongteti tamakok angu. Nisung tashi dak aser nutsüng-nubu aika dak kisung imlar inyakba mapaji kodanga takok mangutsü.

Atangji, kechi mapa sudir suaka, asüküma/ngasadangdema inyakra, teti tetsükdaktsü ajurutsü. "Tsüngremi asükümer nokdang, saka ajemalur nem taochi agütsür" (Yakob-4:6). Aji oda, asenoki asüküma ulua bilema masü, saka tila küma ajemalua, ajak den sungpo-apeutepa, ajak küpoki lur tenzüksü angazükdi. Ajak dak alaka, Tsüngrem tenzük ka dak asüküm jakla keta lira, ibajisa ajak tamajungtiba asütsü. Asüküm jakla aketba lennir ka lenisuba nungji tanidaknur aika malitsü. Asüküm sulenji teti pei sasa ulua bilemba, tenukmerem aser mokokachi dena lir. Anungji asenoki pei sasa ulua bilemba, asüküm aser ngasangadem jakla endokdi, saka ajemalua tila akümstsü angazükdi, kechiyong asüküm agi mepetmesu aser telemsa adokdaktsür. "Ajemaluri alima senmang amangtsü" (T.Ken-37:11). Atangji, ajemalu jakla aketba lennir kaji nubur ajaki akümstsübur aser sapur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Rwanda nung Khristanpuri nukpoker yarir



Luroi/August 20, 2024

(Agencies): CBM UK ajanga küm asem See the Way project takok ngua tembangba sangdongogo, aser parnoki teyarir tem nungi donation sen £845,000 benden aser UK sorkaria UK Aid Match scheme nung shilem ka ama kasa sen agüja sen ajak agi £1.8 million dak tema bendentet.

Tayongzükba balala ajanga bendenba sen ya Rwanda nung tenük apokba nungi jenbutüsü aser anepalutetsü mapa inyakba nung amshi aser Rwanda nung meyirijang aika takum jenjang tajungba kumdaktsü.

Iba project ya tenzükdang eye health consultations ajanga quality standards atonger shilem 17.5 dang liasü, saka iba project ajanga training agüja mentoring mapa inyaka aser nungdakba osettem aliba ajanga shilem 73 akum.

CBM UK yagi Kabgayi Eye Unit aser Catholic Diocese of Kabgayi den lungjemer nisung 35,608 nem screenings, treatments aser surgery densema nungdakba eye health services agüja liasü.

Küm asem project nungya parnoki cataract surgery 2.487 agia liasü, anungji tenük poker alirtemi tanaben angu aser mozüki pezü nung wheelchair ramps, tactile walkways, aser accessible toilets inoka liasü.

Rwanda nung CBM indang mapa nung shilem ka ama linük nung nüburttem pei sasa eye health services tajung agütsütetsü healthcare staff nem training agüja awareness agütsütsü atema education programme balala ayongzüka liasü.

Rwanda nung University Teaching Hospital of Butare nung Ophthalmic Clinical Officer, Liliane Ingabire-i

ashiba agi, “Onok indang service provision nung ajak ayimjemtsü onoki angazük. Tangbo onok sign language nung training agiba staff tem lir aser Ophthalmology Department leni aoba tactile walkway lenmang khenyongi balaka yangluogo. Item nungdakba preitsü atema facilities yanglushi.”

“See the Way project yagi Rwanda nung rural district pezü nung sensaktiba nüburttem eye health service tajung agütsür,” ta CBM UK Chief Executive Kirsty Smith-i ashi.

“Tenük treatment agiba sen agütsüba dang masü saka local services tajungba kuma yanglutsüba ajanga nüburttemi treatment atema meta talangi aotsü menügdaker, Teyarir, partners aser UK sorkari iba project takok ngua inyadaksüba atema nenok ajak dang kanga pelar,” ta Smith-i ashi.

Yangji alirtem asoshi iba project ya takum nung temelenshi ka ama lir, aser tammang nung lia arurtem atema teimla tasen agütsür.

“Tangbo ni kü kinungtsü, tanurtem aser kidangertem ajiteter. Ni iba jenjangi tanaben aruba atema pelar. Tang ni alima tasen ka nung ali ama bilemer. Ni mapa ajak inyakteter,” ta küm asem cataracts keter alisang Cyprien-i pelasetta ashi.

ANOGO ABEN TSÜNGREM DEN

Tindang Aser Shitak

- T.Ken 119:137-144

Kodangsa asenoki dokan nung oset alidir tajung, majung tendanger junger ta kuli zülua aliba repranger junger ta zülua aliba osettem alir. Kasaji chiyongtsü nunga tajung ta zülua aliba chiyongtsütem alir.

Tsüngremer O ji tendanger shitak ta ngutet. Ibai kuli tejangja lir. “Ne tenangzükbatem tendangogo aser aji atangji, aji asünung ne tenzükeri aji meimer” (t.140). Ibai mi tesashi ajanga tendangba lir. Hon temeja metettsü asoshi mi tesashi nung tendanger, taribia yamaji tendanger. Asenoki Arogo otsü zünga aser Laishibaji reprangra, Tsüngrem O ji mi ajanga aoba angutsü. Abrahama ibai tendang aser shitak ta ngutet. Kongi aotsü memetet pai par ki toktsür ao saka pa Tsüngrem O kar liasü, aser Tsüngremi pa angu. Mosaia arem nung küm lir alidang Tsüngrem O tendang. Tenüngsang Ken nung Dawidi mi ajanga aoba asenoki angur. Pai kechi inyak ? Pai Tsüngrem O ji tendang.

Laishibaji tendang aser tetendangba nung takok angu. Ibai ochi, tiyazü kecha maten. Anungji ibai ajaki amangtsü akok. Otsü ajunga nung shirnoki Kibuba dak amang parnoki ashitsü akok, “Nai Tsüngrem O dak metaloktsü akok.”

Nai ne taküm nung Tsüngrem O ji tendanger asü? Na tang mi tesashi ajanga aotsü akok. Yamaji ka süra, nai timtem aremzükba kuli kaji Tsüngrem O ji temerük, tasüngtet aser amangtsü tetemsü ta nai kuli angutsü. Ne sasa Tsüngrem O ji tendangang aser ibaji atangchichila ta metetang.

Küm ka sülena Pakistan nung Khristanpuri ochi obendang mangur

Lahore, Luroi/August 20

(Agencies): Pakistan nung Khristanpur dak lendong tesashitaba agütsür küm ka sülena tamanger temi August 16, 2024 nü Jaranwala nung ki o jen raksatsüba atema ochi obendang khanga liasü, kechiaser iba maparen nung apur timba chiokogo, ta osang ajanga ashir.

Khristanpur adianu anati Islam yimsü mezügmeshia zülü aser Quran shisa ta tai tongloktsüba sülen Muslim nung meyirijang aika August 16, 2023 nü Jaranwala nung adenshia tekülem ki 25 dak tema aser Khristanpur ki 85 raksaja osettsüset auya. Iba lendong ya ajanga linük tesem balala nungi aija liasü.

Iba mapa tamajung inyakba atema nisung 300 dak tema apuba nungi temulung melemtetisi nung ter shi anti-terrorism court nung ken o benoka lir, ta Minorities Alliance Pakistan indang mendenpuba, attorney Akmal Bhatti-i ashi.

“Police temi junga bushisüngdang masüba ajanga iba ken o nung temulung melemtetisi alir timba bail nung chiokogo mesüra kar odang chiokogo,” ta Bhatti-i Christian

Daily International-Morning Star News dang Faisalabad nungi ashi.

Khristanpur nemo chi obendang magütsüba ya Pakistan indang constitution mezügmeshiba lir, kong religious minorities tem kumzüka ayutsü shia lir, ta attorney aser yimten leniri ashi.

“Jaranwala nung atalokba yagi Pakistan nung tamangba yimsü tsütsü kin tila temi timtem ajuruba sayur. Sorkari aibelener nem obendang magütsüba ajanga tarutsü nunga iba ama lendong timtem nungi religious minority tem kumzüka ayutsü tejangraba mesayur,” ta pai ashi.

Iba maparen nung temulung melemtetisi alir nisung 5,213 nungi 380 dang apu aser 4,833 tang tashi meputeti lir ta Amnesty International ajanga ngutet.

“Temulung melemi apur rongnung 228 bail nung chiokogo aser 77 anema ken o benoka aliba agienogo,” ta Amnesty ajanga Right to Information Request benokba sülen police nungi osang agütsüba nung ajitet.

Temulung melemi alirtem anema ken o jembu metenzük aser iba mapang ki o jen rasar

shilem 40 shi tang tashi sorkari nungi teyari mangu lir, ta Amnesty ajanga ashir.

“Ketdangtsür temi ochi obendang agütsütsü shiaka maparen shidak meinyakba ajanga Jaranwala lendong agütsürtem ozüng agi malener,” ta Amnesty International nung deputy regional director for South Asia, Babu Ram Pant-i sangdong ka nung ashi.

Pakistan nung Islam yimsü mezügmeshi ta tai tongloktsüba ya kanga bulua lir, aser Islam indang prophet Muhammad mezügmeshiba nung aitsür nem tasüba temerenshi agütsüteter. Ketdangtsür temi blasphemy atema tang tashi tasüba temerenshi agütsüba meliaka tai tongloktsüba kisüng ajanga lokti adenshia ki o jen raksaja azüdokshiba alir.

Khristan kati parnok tsüngta mangatettep adokba ajanga tiaüz nung tai tongloktsü ta anti-terrorism court ajanga ngutetba sülen Jaranwala nung Khristan adianu ana nem küm tetenzüklen temeden agütsüogo.

August 16, 2023 lendong sülen Jaranwala nung aliba Khristanpur tang tashi timtem balala ajurur, ta adianu ana

yagi ashi.

“Tensa tamajungba kumogo, kechiaser ozü kidanger Muslim nung aser dangar temi onok den o jembiba mesüra business inyakba anenogo,” ta Salim Masih-i Christian Daily International-Morning Star News dang ashi.

“Ni sü arba dokan ka lapoka liasü aser Muslim nung asem-pezü ka inyaka liasü, saka iba lendong atalokba sülen ozü Muslim nung ali kiburi dokan azüngtsütsü ashi aser staff temia kü kübok inyaktsü memulung.”

Kasa tesem nung alir Yaqub Gill-i ashiba agi, sorkari ken o pongu benokba den Khristanpuri private cases 17 benokba rongnung pa dena liasü.

“Yangi aliba Muslim nung temi kü dang ken o agientsü mapang shia amokmeren. Ni police nem osang agütsü, saka item nisungtem anema mera agitsü melena parnoki ken o taila ka nung ni züngok,” ta Gill-i ashi.

“Ozü nisung aika anasa factory tem nung inyaka liasü, saka iba lendong atalokba sülen aika mapa nungi anentsüogo. Business tilala alirtem takoksa

ajuru, kechiaser yangji aliba Muslim nung temi parnok den business meinyaker,” ta Gill-i ashi.

Police temi iba timtem agütsürtem apu tenzüka sülen extremist party Tehreek-e-Labbaik Pakistan (TLP) züngsem temi ken o agienang ta Khristanpur amokmerena liasü.

“Amokmerenba ajanga Khristanpur aika okadak tenük kuli alir ama nokdaktsü memulung, anungji temulung melemi alirtem bail nung chiok,” ta pai ashi.

Human Rights Commission of Pakistan nungi Salman Farooq-i ashiba agi, tawa bail nung chioker tem rongnung Younis Machhi dena liasü, shibai nüburttem adenshitsü atema mosque loudspeaker nungi sangdonga liasü.

Khristanpur dak timtem agütsütsü Younis Machhi-i ajungmesoba kuli tejangja video nung lir, saka pa bail nung chiokogo. Tepuokdak nung chioker ajunga amai ‘hero’ ama agizüker, ta Farooq-i ashi.

Kuli tejangja bushitsü atema Jaranwala semdangba mapang police temi apuba aser merenshia amshiba indang Khristanpur aikati ashi, ta Farooq-isa ashi.

AO OSHI ANGAZÜKDAK: TANÜ ANGAZÜKTSÜBA OJANG



Tamaitüsü

(n) tangar den maiteptsüba ayak (sign, mark)

* Ozü kidangi aoba lenmang nung tamaitüsü ka yuja lir.

Tamajung

(adj) tajung masü, tagila masü (bad)

*Nisung tamajungi o tamajung jembir.

OLONG PAITEP # 6901

	1	2		3	4	5
6					7	
				8	9	
		10				
11						
			12			
13	14		15			16
17					18	

TIPIEN

- Inyaker ajangtetba
- Bangsemo adokdak
- Shitak mesüi inyak
- Ya mimong nung angur
- Reprangzük
- Tasola
- S _____
- Yagi ajak ashiochtsür
- Ki aokba oset
- Ak shi nung inokba tasen
- Ishika

LANGTSÜNGLEN

- Meshidak
- Tanaben soshir
- Iba anogo
- Meshi
- Yagi mi tsükloker
- Shi tapu ka
- Yagi ayimer saka ozü masü
- Ajokba shiruru ka
- Inyaktet
- ____ hi
- Akümlü nungi pilar

OLONG PAITEP # 6900 TELANGZÜBA

TIPIEN :

- Telok, 4. Aluru, 6. Ozüng, 8. Emk,
- Kin, 10. Teti, 12. Süir, 13. Jen,
- Ola, 16. Talak, 17. Mazük.

LANGTSÜNGLEN :

- Tenükjang, 2. Luden,
- Kioktsü, 5. Lenti, 7. Tajangzük,
- teronem, 12. Sempa,
- Jahaz.

NAI-A YA METETTER MA



Alima nung tantsütila Maria Branyas Morera (USA/Spain)

August 19, 2024 nü alima nungi pilaogo. Iba osang ya Guinness World Records-i metetdaksü aser la asüba ya Gerontology Research Group ajanga jangjatsüogo. Maria ya arishi küm 117 ser anogo 168 nung asü.

Catalonia, Spain nung nursing home ka nung Maria asü aser tesüiba küm 20 tashi la idakji lia aru. January 2023 nung Lucile Randon (France) asüba sülen Maria ya alima nung tantsütila liasü.

Maria tanur asüdag America nung liasü. La March 4, 1907 nü San Francisco, California nung aso. Iba sülen la Texas aser New Orleans nung aliba sülen lar kibong 1915 nung Catalonia-i meypa ao.

Guwahati nung taila sen shibelener nisung 3 apu



Guwahati, August 20, 2024 (Agencies): Police nung Special Task Force (STF)-i Guwahati kübok Khanapara tesem nung taila sen amshir nisung asem apu.

Iba mapang police-i taila sen Rs 8.3 lakh apu. Osang

tejangja ka angazükba sülen Inter-State Bus Terminal (ISBT) anasa mita aodang par asem apu.

STF-isa taila sen dak alia chichiba sen Rs 1.28 lakh ngutetogo. Iba dak sendakba nung tetsür ka dena nisung asem apu.

Par asem ya Sahil Ali, Ajay Vishwakarma aser tetsür ka lir aser parnok nija gari ka ajanga taila sen belen.

Police-i gari (AS 01 FZ 5890) den par asem indang mobile phones puogo aser maneni bushisüngdang südar.

Manipur police-i CM indang taila audio clip bushisüngdang

Imphal, August 20, 2024 (Agencies): Manipur nung Chief Minister N Biren Singh indang audio clip ta ser tiyazü ka prokshiba atema Manipur Police-i bushisüngdang tenzükogo.

Manipur police nung Cyber

Crime branch-i iba ken o agizükogo kechiyong iba audio clip ajanga state nung tensa raksatsü akok ta parnoki bilemer.

Iba audio clip ya police-i August 7, 2024 nü meteta aküm

aser iba ya social media sabang aika nung prokshir.

Chief Minister's office-i iba atema ken o ka benok aser state sorkari yimjung yanglutsü merangba mapa anema iba clip yanglur prokshir ta aitsüogo.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

Dated, Kohima, the 20th August, 2024.

CORRIGENDUM

NO.DTE/ESTT-2/NEET/01/2024-25: In continuation to this Office Notification of even number dated 19th August, 2024 under Backward Tribe (BT) reservation for Sumi-Kiphire tribe, the provisional selected candidates for MBBS are Ms. Inalivi T Sumi Merit, No - 212 with Score 354 and Ms. Lara Vinti Yeptho, Merit No - 270 with Score 341 and not as notified earlier.

(ER. VIPULHOU LHOUNGU)
Director.



GOVERNMENT OF NAGALAND DIRECTORATE OF INDUSTRIES & COMMERCE NAGALAND: KOHIMA



ADVERTISEMENT

Entrepreneurship Development Centre NAGALAND TOOL ROOM & TRAINING CENTRE

Presents

"The Entrepreneur's Challenge"

"Call for Business ideas! Win a Grant of 5 Lakhs for Your Business Idea!"

Interested participants from Dimapur District can register for the event by filling up the Google form from the link given.

<https://forms.gle/sXbUJVzUzfeNCoND7>



Last date of submission: 17th September 2024. Hurry limited slots

Nodal Agency: Indian Institute of Entrepreneurship (IIE), Guwahati
Sponsored by: North Eastern Council (NEC), Shillong, Govt. of India

NOTE:—

- Interested individuals from Dimapur district, register now for an opportunity to showcase your innovative business idea and compete for the substantial grant prize.
- Age Limit 18-40 Years.
- Business venture older than 5 years shall not be eligible for support under the programme

Shortlisted candidates will be notified for subsequent round of selection/ screening.

For Queries: 6009027544/8258977353



Sd/- Director, Industries & Commerce
and C.E.O., NTTC

Taoba Bangladesh PM Khaleda Zia indang bank accounts lapoktsütsü



Khaleda Zia

Dhaka, Luroi/August 20 (Agencies): Bangladesh nung tax ketdangsür temi küm 17 shibanga yutsüba sülen Bangladesh Nationalist Party Chairperson Khaleda Zia indang bank accounts tem lapoktsütsü telemtetba agiogo. Hombarnü National Board of Revenue (NBR) ajanga bank tem dang BNP Chairperson Zia indang account tem 'unfreeze' asütsü tuyu, ta Daily Star osangkaket ajanga ashi.

2007 küm August ita NBR indang Central Intelligence Cell ajanga bank tem dang BNP Chairperson indang account tem soita ayutsü totuyuba agüja liasü, shiba 1990 sülen anaben tashi Bangladesh indang ato kilonser shima liasü.

Iba telemtetba ya iba mapang Army temi nungitba caretaker government ajanga

kumtetba panel kati ashiba nung ajemdaker telemtetba ya agi, ta NBR nung ketdangsür kati shia liasü. Iba sülen la indang accounts tem nokdanga liasü. BNP ajanga aiben item account tanaben lapoktsütsü khanga liasü.

Mapang tatsüka lir Rupali Bank indang Shaheed Moinul Road branch, Dhaka Cantonment nungi ita shia sen terara agizüksü mela.

Iba mapang caretaker government-isa Sheikh Hasina indang bank accounts tema nokdanga liasü, saka la ato kilonser akumba sülen lapoktsü.

Mapang talangka nungi Khaleda den tokteper süa aruba Hasina sorkar nüburtemi August 5 nü laodakja Bangladesh Awami League

ajanga küm 15 yimsü süa aruba tatem kati aruba sülen tang

tesüsa iba mera ya agir. Nobel prize angur Muhammad Yunusi anir interim government ka August 8 nü kumtet.

Arishi küm 76 tain Hasina ya August 5 nü India-i jena aoba sülen arishi küm 79 tain Zia ya tepuokdak nungi chiok. Zia ya Bangladesh indang ato kilonser ama March 1991 nungi March 1996 tashi inyak aser ano June 2001 nungi October 2006 tashi inyaka liasü.

Khaleda indang lawyer temi account tem lapoktsütsü atema Deobarnü application agütsü ta NBR ajanga ashi.

"La dak sendakba nung tax dak sendakba ken o bushisüngdang metembangteti malinung onoki bank tem dang la indang accounts ajunga lapoktsütsü ashi. Onoki iba mera tangsa agia osang agütsütsü shiogo," ta ketdangsür kati ashi.

Mpox ya new COVID masü, prokshia aoba azüoktettsü: WHO

Berlin, Luroi/August 20 (Agencies): Mpox ya tejena süang mesüra tasena süang, new COVID masü aser iba tashidak prokshia aoba azüoktsü atema alimai meranga inyaksü tongtipang, ta WHO Regional Director Hans Kluge-i Mongulbarnü ashi.

Osangbener senden ka nung jembidang, Kluge-i mpox anepalutsü aser samatsütsü atema mapa tajung inyaksü ajungshi aser alimai telangzüba agütsüba ajanga tarutsü nung public health tendangtsü ta ashi.

"Asenok külemi mpox azüoktettsü aser azüoktsüla. Anungji alima nung mpox azüoktsü aser samatsütsü atema asenoki mera agütsü na? Mesüra asenok ano tetsübo aser sübosüyimba tia kati aitsü? Tang aser tarutsü nung asenoki telangzüba agütsüba ya Europe aser alima asoshi tongtipang tetandangba alitsü," ta pai ashi.

Mpox ya virus ajanga adokba tashidak ka lir, koba ajanga nisung temang nung tzü tatsük agi aletba ama awaker, yimra ama timtemer, koba kanga tesashibo masü saka nisung asür.

Mpox indang clade 1b variety ajanga alima ajunga



nung nüburttem shisabulur, kechiaser ibai kanga temelaba nung prokshia aor amai ajiteter. Taoba hopta iba tashidak agi shiranger ka Sweden nung putet, koba Africa nung jateta aliba den sendaktepa lir.

Clade 1 strain tasenba nung ranglokba ajanga Europe nem kanga tajemba clade 2 variety nung ranglokshitsü maongka agütsür, ta Kluge-i ashi. European region nung ita shia clade 2 mpox strain indang cases tasen 100 shi puteter, ta Kluge-i ashi.

WHO-i tang Africa nung pokteta aliba mpox ya global emergency ta sangdongba sülen Kluge-i iba osang ya sangdong.

Hombarnü Congo indang Health Minister roger Kamba-i mpox tashidak azüoktsü atema taruba hopta US nungi vaccine doses yoktsü, ta shia liasü.

African linük ter dak tema nung mpox cases ya tanurtem aser teinlonglongtem dak puteta lir aser iba virus tasen ka prokshiba mapang lir. Ajisüaka iba continent nung vaccine doses kanga ajema lir.

Mpox cases timba Congo nung lir aser tang vaccine doses 3 million nungdaker. United States aser Japan nati vaccine tenlatsü ashi, ta Kamba-i osangbener dang ashi.

Taküm alima nung mpox cases 17,000 dak tema aser tasüba 500 dak tema aliba WHO-i sangdonga lir. Cases aser asür shilem 96 dak tema Congo nung lir, kong ki o jen tajung maliba aser linük tulu asüba ajanga tashidak azüoktsü atema timtema arur.

Congo nung mpox cases ya shilem 70 aser tasüba shilem 85 shi arishi küm 15 tekübok tanurtem lir.

Molungnen O

ASO
15 March 1937
ASÜ
16 August 2024

Onoki teti meima aliba temeim ojala **Nungshitula** (Longjang), shiranga aliba anogo nungi tasünü tashi kija aser kibong, Arogo, yimden aser lokti balalai ozü den sarasadem, nübu, shisatsü aser rongsen agi yariteper ajunga dang onoki kanga pelaba lemsateper.

Teyanglur Tsüngremi nenok ajak maneni moajangma ta ozü sarasadem.

Temeim
Chimur, Semchir, Anükapang aser Kinungertem.

TEACHER WANTED

For a reputed School in Dimapur

Applications are invited for the posts of:

Sl. no.	Subject	post	Qualification
1.	Music	1	Graduate in any stream with Grade 8 or Bachelor in Music
2.	Maths & Sci.	1	B.Sc (PCM), Mathematics B.Ed/D.Eld

(experience preferred)

Pay Scale : 11,800 - 19,700 + Grade Pay 3300/- House rent allowances, Dearness allowances, EPF, Medical allowances etc.

Application, Resume and necessary documents must reach office on or before 26th Aug., 2024

7005755299
Sd/- Principal

Philippines-i Afghan nunger jenoka atadaktsütsü mulunga agizükogo

Manila, Luroi/August 20 (Agencies): United States nung teti atema amenoker alitsü asoshi asadanga aliba Afghan nunger kar khen atema jenoka atadaktsütsü asoshi Philippines-i mulunga agizükogo, ta US aser Philippine ketdangsürtemi metetdaksü.

Philippines nung visa atema inyaktepba mapang US sorkari Afghan nungertem, chiyongtsü, talidak ki, security, medical aser senzusenpong densema tanga tenüngdakba maparen ajak nongita yaritsü, ta US Department of State-i Hombarnü sangdong ka ajanga metetdaksü.

Philippine Department of Foreign Affairs-i sangdong ka ajanga ashiba agi, iba tenangzüktepa ya tang teyangludak lir aser mapa takok ngua benoktsü atema kidang ken o tembanga jembishinüdar.

Washington aser Manila napronglai Afghan nunger kwi Philippines nung visa atema inyakteptsü, iba indang osang tejangja magütsü.

Ajisüaka US ketdangsür kari ashiba agi, Afghan nunger 300 indang application Philippines nung inyakteptsü, ta Washington Post sangdong ka ajanga metetdaksü.

Philippine tir Ferdinand Marcos Jr lenisüba kübok Washington aser Manila na tesendaktep tawa akangshia aruba nung tang iba tenangzüktepa yangluba ya-a kuli ka lir.

2021 küm nungi Afghan nunger 160,000 dak tema US nung lia arudar. US atsüngina Taliban puri sorkar atsüngba sülen Afghan nungertem aika US-i oa liasü.

Maneni Afghan nunger meyrejang aika Operation Allies Welcome inyakyim kübok US-i aotsü atema visa asoshi inyaktepba mapang tang tanga linüktem nung jenoker lir.

Afghanistan nungertem jenokdaktsütsü atema US-i mepeshiba indang osang temai adokba sülen temzüng ozüng aser security dak sendakba nung Philippines nunger kari ken o ashishia liasü. Iba osang ya taoba küm sangdonga liasü.

Marcos-i taoba küm June ita ashiba agi, iba ken o ajanga security dak sendakba nung ken o aika adok aser paisa, Philippines-i refugee tem agizükba indang inyakyim dak rangloker jembia liasü.

Ilkay Gundogan international football asaya nungi anener



Luroi/August 20, 2024 (Agencies): Germany captain Ilkay Gundogan-i Hobarnü sangdong ka ajanga pa international football asaya nungi anenba metetdaksüogo. Pai tatemsa linük team Euro 2024 nung ania liasü.

“Hopta ishika asadanga sülen ni national team nungi asaya anentsü mapang tongogo, ta apiteta liasü,” ta Gundogan-i ashiba German FA sangdong ka ajanga metetdaksü.

“Ni linük tenüng nungi international asaya 82 nung asayatetba atema kanga nema danga bilemer, koba ni 2011 küm mezügbuba senior national team nungi asayaba mapangbo ni paiben ya

asayatetsü ta bilema maliasü,” ta pai ashi.

“Ni taküm kidang European Championship nung captain ama team anir asayatsü maongk anguba ya ni atema tetushi tulu liasü,” ta Barcelona midfielder yagi ashi.

Gundogan shibai Manchester City nungi season tenet asayaba mapang Premier League pongu aser Champions league ka koka lir, pai Euro 2024 metenzük tsünga kanga mazüngi asayaba ajanga tetsükdaksü adokba indang lemsatapa liasü. Pa City nungi season tenet asayaba sülen taoba küm Barcelona-i oa liasü.

“Ni shi temang belemba dang masü tekolok shisatsüa

kanga bilemba meteta aküm aser iba ajanga asaya nungi anentsü atema bilemdang tenzük. Club aser national jenjang nung asaya ya tajembabo makümtsü,” ta pai ashi.

“Ni maneni national team fan ka asütsü aser team maneni tejakdangi renloka aotsü imlar aser 2026 küm World Cup akoktsü pur rongnung ka asütsü kechaia asenok menokdangtetsü.

“Asenok coach kanga tajung, team-a kanga tajung aser team tanüla kanga tajung lir,” ta pai shisem.

Gundogan national team nungi mezügbuba 2011 küm October ita Belgium den asaya saka yiruba ajanga 2014 küm World Cup akokba team nungi masayatet. Maneni pa 2016 küm Euro nunga temekok yirur aliba ajanga masayatet.

Pa ya Turkey nungi jakzükba Germany nunger footballer tem rongnung national team captain sür asayaba mezügbuba asayar lir, aser pa tongtibang asayamung pezü nung shilem agiogo

“Ilkay captain kanga tajung ka liasü, aser pa den maneni inyaknüa liasü,” ta Germany coach Julian Nagelsmass-i ashi.

“National team kishi ajungabo meshibangi lir, saka onoki pai telemtetba agiba akümtsübur aser par tarutsü takok nung aotsü imlaja atar,” ta paisa shisem.

Leicester City-i midfielder Oliver Skipp alizükogo

Luroi/August 20, 2024 (Agencies): Arishi küm 23 tain midfielder Oliver Skipp, Tottenham Hotspur nungi Leicester City nung denogo. Pai Leicester den küm pongu atema tenangzüktepba yangluogo.

Pa sen kwi agi alizük iba indang osang tejangia magütsü, saka British media sangdong balala ajanga ashiba agi, pa pound million 20 dak tema agi alizüker alitsü ta amanger.

Spurs nungi asayaba mapang Skipp asaya 106 nung asaya liasü. Maneni pa youth level balala nung England tenüng nungi asayaogo aser iba mapang pa dak sempet tajung aliba asayar tajung ka akümtsü lenmang sadema lapoka aliba reprangteta liasü.

Leicester den tenangzüktepba yangluba sülen Skipp-i iba club nungi asayatsü tejangra aliba lemsatapa liasü. “Ni iba club nung adenba atema kanga pelar. Asaya ajak toktepa asayatetsü club nung asayar



tajung aika lir ta amanger,” ta pai ashi. Paisa, “ni iba telok yagi kechi ajangzükttetsü aji jangjatsü yongya atar,” ta shi.

Leicester City pur Hombarnü Premier League season tasenba nung mezügbuba asaya Skipp indang taoba club Tottenham Hotspur den Hombarnü asaya koba goal kasasa agütsüur tambanga liasü.

Leicester City pur relegate asüba sülen taoba season Championship nung asaya saka parnoki takok tajung anguba sülen taküm ano maneni Premier League nung asayatsü atema maongka ngutetogo.

Pakistan nunger pacer Jamal Bangladesh den masayatetsü



Luroi/August 20, 2024 (Agencies): Bodhbarnü nungi tenzük Bangladesh den Test asaya ana masaya tsünga Pakistan cricket team tetsükdaksü aika adokdar, kechiyong fast bowler Aamir Jamal-a temang majungba ajanga masayatetsü kümogo. Jamal shiba teberem yiruba ajanga mapang tatsüka kangshia arudar, pa National Cricket Academy, Lahore nung temang anepalutsü.

Jamal temang mejungi liaka iba ICC World Test Championship series atema mezüng shiba asayatem rongnung densema liasü. Ajisüaka pa taküm küm tetenzüklen England nung County cricket asayaba mapang yiruba tang tashi kanga junga taneptsü mongui lir. Ibayongji arishi küm 28 tain asayar ya iba tongtibang asayamung nung shilem magitetsü kümogo aser Pakistan squad nung asayar 14 dang kümogo.

Hopta tatemi spinner Abrar

Ahmed aser top-order batter Kamran Ghulam na squad nungi züngtokba sülen tang Jamal-a masayatetsü kümogo. Iba asayamung nung Pakistan nunger fast bowler tem Shaheen Afridi lenisüba nung asayatsü aser Naseem Shahia tongtibang shilem agitsü imlar. Fast bowler tem rongnung Khurram Shehzad aser Mir Hamza nata densema lir.

Pakistan team tang World Test Championship nung jenjang trokbuba nung lir aser Bangladesh den asayamung akoktsü timla nung lir. Iba asayamung kokra parnok taruba küm Lords nung final asayatsü asoshi maongka angütsü.

Bangladesh den Test asaya asoshi Pakistan team:

Shan Masood (c), Saud Shakeel (vc), Abdullah Shafique, Babar Azam, Khurram Shahzad, Mir Hamza, Mohammad Ali, Mohammad Hurraira, Mohammad Rizwan (wk), Naseem Shah, Saim Ayub, Salman Ali Agha, Sarfaraz Ahmed (wk), Shaheen Afridi.

ICC Rankings: Indian opener Smriti tasembubai tuogo



Luroi/August 20, 2024 (Agencies): Tawa sayaba ICC ODI rankings nung India tetsür team vice-captain Smriti Mandhana jenjang ka tejakdangi tua tang tasembuba nung lir. Lai rating point 738 ngua liasü.

Lai tang iba jenjang tongtetba sülen la ya 50-over format nung India tsürtem rongnungi ajak dang tajungtiba asayar ka kümogo.

India tsürtem rongnungisa

tang 32buba nung, Harshitha Samarawickrama jenjang ti tejakdangi tua 44buba aser kavisha Dilhari jenjang pezü tejakdangi tua tang ODI batting rankings nung 50buba nung lir.

Kasa mapang nung T20 rakings nung Mandhana maneni jenjang pezübuba nungi masetshi lir. T20 rankings nunga tanga linük nungi asayatem aikati alizüng tasen tongtetogo.

Sri Lanka tsür Harshitha Samarawickrama aser Ireland team opener Gaby Lewis nati tawa kanga junga asayaba sülen tejakdangi tuogo.

Ireland den tanabuba T20 asayaba mapang Samarawickrama-i ball 44 nung run 65 yangluba sülen la jenjang asem tejakdangi tua tang 13buba nung lir.

Kasa mapang nung Lewisia ball 75 nung run 119 yanglua lar team-i asaya akokba nung teyari tulu agütsüba sülen la jenjang pezü tejakdangi tua tang 21buba tongtetogo. Jenjang 21buba ya la asoshi tang tashi nung rank tajungtiba lir koba lai 2022 July ita-ta tongteter liasü.

Sri Lanka tsürtem rongnungi Nilakshika de Silva jenjang asem tejakdangi tua

BILEMDANGANG

“O agi dang nisung jashir aser pelar.”